

Høyringsvar vedkomande omgjerung av barnehagar og skular til oppveksttun i samband med budsjett 2021 – med vekt på omgjerung av Haus skule til oppveksttun og flytting av 5.-7. trinn til Lonevåg skule

Utdanningsforbundet ved Haus skule meiner det er urovekkjande viss denne endringa i skulestrukturen skulle skje. Det er ein alvorleg inngripen i kvardagen til både vaksne og born, og me stiller spørsmål ved planlegginga av denne omlegginga og dei praktiske rammene rundt. Me stiller oss og svært kritiske til den manglande pedagogiske grunngevinga for denne store omorganiseringa.

- For dei tilsette vert det no usikkerheit rundt eigen arbeidssituasjon, både med tanke på kor ein skal ha arbeidsstad og ved at ein potensielt sett skal kunne nyttast både i skule og i barnehage.
- Samarbeidet mellom to profesjonar kan bli vanskeleg. Dette med tanke på ulik arbeidstid, ulike arbeidsplassar og ulik kultur i skule og barnehage.
- Me stiller og spørsmål ved om det blir innsparing ved å sende 5.-7.klasse til Lonevåg. Dette med tanke på at fleire av foreldra kan kome til å velja privatskular i staden for. Kva vil skuleskyss eigentleg kosta? Kva vil ombygging/tilpassing til bruk for barnehageborn kosta? Innkjøp av leiker, møblar osv, tilpassa barnehageborn? Eit anna spørsmål me stiller oss er om kommunen totalt sett tapar meir enn han vann. Det er i den samanheng viktig å få på bordet kva ein skuleplass på privatskule kostar og kva inntekter kommunen tapar på det.
- Ein annan konsekvens er at fagmiljøet vil bli lite på kvar arbeidsplass. Kompetansen i personalet blir redusert. Regjeringa sitt kompetansekrav frå år 2025 vil bli ei utfordring for kommunen å iverksette. Rekruttering til eit så lite fagmiljø visar seg i praksis å vera utfordrande og lite attraktivt.
- Det vil vere svært uheldig for elevane å ha ein stor overgang midt i skuleløpet. Frå før av er det ein stor overgang å kome frå barnehagen til skulen, samt frå barneskule til ungdomsskule. Forsking viser at for mange overgangar i ung alder er uheldig for barnet si psykiske helse. Våre elevar skal ikkje berre skifte skule og klasse, dei skal også koma inn i godt etablerte grupper, der sosiale relasjonar alt er godt etablert. Dette kan vera krevjande for mange 10 åringer.
- Den sosiale læringa på tvers av alderstrinna ved vår skule, vil bli svekka ved at dei eldste elevane blir sendt til ein ny skule. Ved å ta vekk 5.-7.trinn frå Haus skule vil fadderordning, TL-aktivitetar og fellesaktivitetar på tvers av trinn bli vekke. Det vil dermed bli eit dårlegare skuletilbod for elevane på 1.-4. trinn. Haus skule har i alle år vektlagt den sosiale kompetansen, som også er sterkt vektlagt i den nye læreplanen.
- Ved samanslåing av skulane vil elevane få lengre skuledagar på grunn av lengre skuleveg.
- Prognosane som er lagt fram i høyringa visar eit aukande elevtal ved skulen. Skular på denne storleiken er gunstig med tanke på å skapa eit trygt, oversiktleg og godt læringsmiljø for born og tilsette.
- Eit auka elevtal kan også på sikt utløyse fleire klassar/kontaktlærarar på Lonevåg skule – då forsvinn lett mykje av den innteninga det er lagt opp til.

Klubben ved Haus skule stiller seg svært negativ til framlegget om å omorganisera skulen vår.